


Departamento di Cultura cu cuater dia di presentacion di San Juan/Dera Gai na muchanan di school primario



ORANJESTAD(AAN): Diasabra awo ta dia di San Juan/Dera Gai. Pa esaki nos a papia cu director di departamento di Cultura, sr. Siegfried Dumfries, mirando cu a tuma nota di un cantidad di mucha cu ta activo cu e celebracion di Dera Gai. El a splica cu anualmente tin e proyecto San Juan - Dera Gai escolar. Ta enfoca hopi riba e muchanan pasobra den maneho di DCA e parti di formacion y informacion di herencia cultural pa school ta esencial.


E ta un di e prioridatnan.

Cada dia tin dos funcion pa cuater dia largo. El a cuminsa ayera diamars, cual lo caba diabierna awo, cu ocho funcion total, caminda 3 pa 4 mil mucha di school primario, ta bishita Cas di Cultura, unda cu nan ta worde informa di e herencia cultural di Dera Gai, cu ta encera con e fiesta aki a origina y con ta festeh'e y kico tur e ta trece cun'e. Ta purba di concientisa nan pa e parti di cendemento di candela, kico mag y kico no mag y kico ta e meta pa esaki.

Cambio:

Cu tempo a trece diferente desaroyo nobo. Segun Dumfries, na 2014 tabata tin un cumbre nacional di cultura, unda cu a sinta cu diferente gremio cultural di teatro, musica, baile y canto y a scucha tur e gruponan aki kico ta e puntanan esencial pa e maneho di cultura na Aruba y mayoria a trece dilanti cu formacion, informacion y educacion riba tereno di cultura, historia y herencia cultural, tanto material y imaterial ta importante.

Tambe e parti di documentacion y digitalisacion di e formacion aki. Pa loke ta e prome punto, ta trahando duru riba dje, cu ta e parti di informa y educa. Esey ta netamente un di nan cu a haci awe cu e parti di San Juan/Dera Gai, cu ta un di e fiestanan cultural mas grandi na Aruba, unda cu ta invita e schoolnan primario y ta informa y educa e hobennan tocante e fiesta aki, di unda el a origina y con ta festeh'e. Pa asina tambe por mantene e



herencia cultural aki bibo. Mirando e maneho cu ta hibando, e ta un meta. E ta un vision pa kico ta haci'e, pa purba di sigui enfoca riba educacion y formacion di e siguiente generacion.

Con ta celebre:




Na prome instante, loke ta haci ta splica unda e fiesta a origina. Splica tambe con ta festeh'e, cu cua artefactonan. Kico ta e meta di e fiesta aki, cu ta un fiesta di cosecha y ta splica nan, demostrando e baile y tambe artefactonan cu ta worde uza y e historia. Pa loke ta den pueblo, den comunidad, tin e parti cu comision Celebracion Dianan Nacional, cu ta CCDN, cu tambe ta resorta bao di ministerio di cultura, ta sostene Centronan di Bario pa mantene e herencia aki bibo. Kiermen dia 24 di Juni, manera tur aña, lo bay tin festeho den diferente centronan di bario di San Juan/Dera Gai, unda cu Gobierno

den e parti cu nan por, ta subsidia cu un suma chikito pa asina mantene e fiesta bibo. Tanto pa loke ta escolar, cu ta cay bao di DCA, como e parti den pueblo, den comunidad, cu ta cay bao di CCDN, ta purba di enfoca pa mantene e herencia aki bibo.

Siman pasa tabata tin un anochi informativo riba Plaza Betico, unda cu Juby Naar a duna un lectura riba e historia di San Juan, e meta y di unda el a origina. Di parti di DCA ta purba di informa, educa y duna e sosten necesario pa mantene e herencia cultural aki bibo, tanto pa school, como pa comunidad.

Nivel escolar:

Dumfries a comenta cu e bunita ta cu tin un bon comunicacion cu e schoolnan. Tin cu bisa cu tanto como departamento di enseñansa, inspeccion di enseñansa y e bestuurnan di



school; DCA tin un bon comunicacion cu nan. Anualmente, nan tin diferente proyecto manera San Juan, Gang di Arte, Arte di Palabra y diferente proyecto mas riba tereno cultural. Ta purba di semper duna back na e schoolnan pasobra ta importante pa e muchanan sigui carga e informacion aki. Anualmente nan tin bon comunicacion cu e schoolnan y bon entrada y tur proyecto escolar ta traha estrechamente

cu e partnernan ya menciona. Pa loke ta e siman aki, sigur 3 pa 4 mil mucha a cater. Cada dia tin dos funcion y tin 4 dia di funcion pa e schoolnan primario. E sala mes ta carga riba 500 mucha, sigur 3 pa 4 mil mucha por haci uzo y conoce e historia aki mas di cerca. DCA ta spera di por sigui traha cu e schoolnan y tambe cu Inspeccion y Departamento di Enseñansa, cual ta hopi importante pa por sigui carga esaki.